

Y Llygoden Fach Gyfrwys

Cyfeillgarwch / Gweld Cyfle / Parch at Fywyd

Y Llygoden Fach Gyfrwys

Diwrnod braf o haf oedd hi. Aeth y llygoden fach am dro i'r caeau. Dechreuodd fwyta hadau'r blodau...ym...ym...ym. Yn sydyn clywodd rywun yn galw ei henw, "Llygoden fach, llygoden fach..." Trodd y llygoden fach i edrych o gwmpas. Gwelodd gath fawr frech ar ben y clawdd. Dechreuodd y llygoden fach grynu. "Tryd yma am sgwrs," meddai'r gath, "rydw i'n teimlo'n unig iawn. Mi ydw i eisiau cwmni. Tyrd ata i i eistedd ar ben y clawdd."

"Ond cath wyt ti," meddai'r llygoden, "mi rydw i ofn cathod."

"Cath yn wir," meddai'r gath, "nid cath ydw i ond Siôn Corn ac fel y gwyddost mae Siôn Corn yn ddyn caredig iawn."

"Wyt ti'n siŵr mai Siôn Corn wyt ti?" gofynnodd y llygoden fach, "Wrth gwrs, Siôn Corn ydw i. Edrych ar fy aelïau gwyn a'r wisgars gwyn o gwmpas fy ngheg."

"Wel, os mai Siôn Corn wyt ti, mi ddoaf atat i gael sgwrs, ond dim ond am ychydig bach gan y bydd mam yn disgwyl amdanaf."

Y munud hwnnw dyma'r gath yn neidio ar y llygoden fach.

'Roedd ei phawen yn gorwedd drosti. Dim ond ei chynffon oedd i'w gweld.

"O" meddai'r llygoden yn grynedig, "fe ddywedaist dy fod eisiau sgwrs..."

Torrodd y gath ar draws y llygoden fach.

"Sgwrs i ddechrau ond wedyn mi fyddaf yn dy fwyta bob tamaid, ac mi fyddi di yn llygoden fach flasus."

Meddylïodd y llygoden fach a gofynnodd i'r gath, "wyt ti'n siŵr mai llygoden ydw i?"

"Wrth gwrs, llygoden fach grynedig wyt ti ond mewn dim mi fydda i wedi dy lyncu."

"Nage'n wir" meddai'r llygoden, "ci ydw i. Ci rheibus."

Doedd y gath ddim wedi gweld llygoden fel hon o'r blaen.

"Ci ydw i," meddai'r llygoden, "ac mi ydw i yn medru cyfarth a brathu."

"Gai dy glywed di'n cyfarth?" gofynnodd y gath oedd braidd yn ofnus erbyn hyn.

Dechreuodd y llygoden gyfarth fel ci.

"Na, na, na" meddai'r gath, "rwyf ti'n cyfarth fel gwich llygoden." Bu'r llygoden yn cyfarth a chyfarth dros bob man.

"Os nad wyt ti'n credu mai ci ydw i yna mi ddoi ar dy ôl i fyny'r goeden acw" meddai'r llygoden oedd yn teimlo'n ddewr iawn erbyn hyn,

'Roedd y gath erbyn hyn yn teimlo'n fach ac yn grynedig.

"O" meddai, "mi ydw i ofn rwan."

Cododd ei phawen oddi ar gefn y llygoden fach. Dyna ei chyfle. Rhedodd nerth ei thraed i gyfeiriad y beudy. 'Roedd ei mam yn brysur yn paratoi cinio o hadau blasus i'w theulu.

"Lle'r wyt ti wedi bod, y llygoden fach ddrwg?" holodd ei mam.

"Mam, mi ydw i yn llygoden ddewr iawn a hefyd yn llygoden gyfrwys iawn."

"Cyfrwys, beth wyt ti'n ei feddwl?" holodd ei mam.

Eisteddodd y llygoden fach gyda'i theulu o gwmpas y bwrdd.

Dyweddodd ei hanes fel 'roedd hi wedi twyllo'r gath fawr frech.

"Wyddost ti," meddai ei mam, "dydw i ddim yn meddwl dy fod ti wedi defnyddio'r gair cywir."

"Pa air?" gofynnodd y llygoden fach.

"Wel, nid twyllo'r gath frech wnest ti ond bod yn gyfrwys a dangos i'r hen gath fawr frech dy fod tithau yr un mor gyfrwys a hithau." Gwenodd y llygoden fach.



O Dduw, pan fydda i ofn ac yn crynu wnei di bryd hynny fy helpu. Amen.



- ✦ Fyddwch chi weithiau yn dychmygu eich bod yn rywun arall?
- ✦ Disgrifiwch pa mor gyfrwys oedd y llygoden fach?
- ✦ Pwy oedd fwyaf cyfrwys y gath neu'r llygoden fach?